

DAP berpegang Perlembagaan Persekutuan, tolak parti perkauman - Lim Guan Eng
Astro Awani
Dis 4, 2016
Harits Asyraf Hasnan

SHAH ALAM: DAP sekali lagi menegaskan bahawa parti itu adalah untuk semua rakyat Malaysia tanpa perbezaan geografi dan demografi terutamanya bagi Sabah dan Sarawak.

Malah, parti itu turut menolak parti perkauman dan mengiktiraf kepentingan untuk bekerjasama dengan parti-parti Melayu dan tokoh Melayu yang terkemuka.

Setiausaha Agungnya, Lim Guan Eng berkata menerusi Deklarasi Shah Alam pada 2012, DAP mempertegaskan beberapa perkara-perkara dalam Deklarasi DAP@50 bakal diluluskan dalam Persidangan Kebangsaannya hari ini.

"Mempertahankan sistem Demokrasi Berparlimen dan Raja Berperlembagaan dengan Seri Paduka Baginda Yang di-Pertuan Agong sebagai Ketua Negara. DAP komited untuk menjunjung Perlembagaan Persekutuan Malaysia sebagai undang-undang yang paling agung negara dan meluhurkannya dalam semangat Merdeka 1957 dan Perjanjian Malaysia 1963

"Memelihara kedudukan istimewa orang Melayu dan Bumiputra serta hak-hak kaum-kaum lain, seperti yang termaktub dalam Artikel 153 Perlembagaan Persekutuan dan memastikan kedudukan Islam sebagai agama Persekutuan serta kebebasan untuk mengamalkan agama-agama lain dengan aman dan damai, seperti yang termaktub dalam Artikel 3 dan 11 Perlembagaan Persekutuan.

"Memartabatkan Bahasa Melayu sebagai Bahasa Kebangsaan seperti yang termaktub dalam Artikel 152 Perlembagaan Persekutuan, serta menggalakkan penggunaan dan pengajian bahasa-bahasa ibunda lain untuk membentuk masyarakat yang cemerlang dan berbilang bahasa," katanya dalam Ucapan Dasar Persidangan Kebangsaan DAP 2016 di sini hari ini.

Tegasnya, sudah tiba masa untuk rakyat menolak politik identiti yang membahagikan dan mengasingkan masyarakat melalui politik identiti perkauman yang membiakkan kebencian dan ketakutan.

"Sedar dengan isu-isu yang melibatkan orang Melayu dan orang Islam, DAP tidak pernah meminta jawatan sebagai Perdana Menteri. Dan kami tidak pernah meminta supaya seorang Cina menjadi Perdana Menteri tetapi sentiasa menyokong seorang Melayu, terutamanya Datuk Seri Anwar Ibrahim sebagai Perdana Menteri.

"DAP tidak akan menguasai kerajaan sekiranya pembangkang memenangi kuasa tetapi akan menjadi rakan kongsi yang adil dan bertanggungjawab. DAP akan mempertahankan dan menegakkan asas Perlembagaan Persekutuan yang dipersetujui pada tahun 1957 dan 1963," tegasnya.

DAP pada masa sama turut tidak bersetuju dengan tujuan sesetengah individu yang mahu mengubah sifat Perlembagaan Persekutuan dengan menggunakan undang-undang biasa yang hanya memerlukan majoriti mudah ahli-ahli Parlimen yang hadir.

Kata Guan Eng, mana-mana undang-undang yang memberi kesan kepada watak dan identiti Perlembagaan Persekutuan mestilah melalui pindaan perlembagaan dengan majoriti dua pertiga selain membantah kepada mana-mana undang-undang yang bercanggah dengan Perlembagaan Persekutuan.

Tag: [DAP](#), [Deklarasi DAP@50](#), [Perlembagaan Persekutuan](#), [parti pelbagai kaum](#), [Persidangan Kebangsaan DAP 2016](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-politik/dap-berpegang-perlembagaan-persekutuan-tolak-parti-perkauman-lim-guan-eng-124661>